

Ikalaata ilya Paulo kwa Fiilimooni Uwandilo

U Paulo ásimbile ikalaata ili kwa Mukilisiti umo udumbwe, itaawa lyakwe áamile wu Fiilimooni. Umutumwa umo uwa Fiilimooni, itaawa lyakwe bhakhatinji uNeesimo, ábhelengushile. Kuwumalilishilo akhabha Mukilisiti, akhikhalaga nu Paulo we ali mwi jeela. Pe u Paulo amugalusii zye kwa Fiilimooni. Mwi kalaata ili akumulaabha uFiilimooni kumutuyila uNeesimo, poope inga ku ndajizyo iya Shiluumi áyitishiliilwe kumugoga umutumwa we ábhelengushile. U Paulo akumubhuzya uFiilimooni amaposheele uNeesimo umutumwa waakwe kubha wu nholo mwa Kilisiti.

Indamukho

¹ Ine ne Paulo, ne inkungiilwe kunongwa iya kulumbiilila intumi zya Yeesu Kilisiti. Peekka nu nholo wiitu mu lwitikho uTiimoti, itwe tukukusimbila Fiilimooni, wumubhombi uwamwitu umaganwa. ² Tukubhasimbila na bhantu abha shibhanza bhe bhakubhangaana nu nyumba yaakho, peekka nu yilumbu wiitu uAfiya, nu Alikipo, umusikaali uwamwitu mu mbombo ya Mulungu.

³ U Taata uMulungu nu Mwene uYeesu Kilisiti bhabhalolelaje uwiila, na kubhapa uwutengaanu.

UPaulo akumulaabhila uFiilimooni

⁴ Wiila bhulo we inkumulaabha uMlungu, inkukukumbukha niwe na kumusalifwa kunongwa yaakho. ⁵ Kunongwa ye inimvwizye izya shila she umwitishile uMwene uYeesu, na shila she umuganile uYeesu peeka na bhafinjile bhonti.* ⁶ Inkumulaabha uMlungu kuti, uwupeeka wanuwo we uli nawo nitwe wakubhishe kuti, uyavwaje abhanji, ufishile kumanya inyinja zyonti zye tukazyaga kwi dala ilya kupatinhana nu Yeesu Kilisiti. ⁷ Nholo wiitu mu lwitikho, ku lugano lwakho lunulwo, wabhasansamuya amooyo abhafinjile, niine insesheeye nhaani, naagoma mu mwoyo waani.

UPaulo akumulaabhila ishisa uNeesimo

⁸ Kunongwa ye impatinhiine nu Kilisiti, inkwitishilwa kukulajizya ku wudandamazu lye ukhondeeye kubhomba anzu nholo awe umusundikwa. ⁹ She poope zili shiniisho, kulonga kwani kutibhe kwi dala ilya kukulamba mu lugano. Ine ne Paulo, ne ne mugoosi ne inkungiilwe mwi jeela kunongwa ya Yeesu Kilisiti. ¹⁰ Inkukulamba ku zya mwana waani uNeesimo.† Mu khabhalilo khe inkungiilwe ipa na manyoolo, inhamulumbiilila, akhabha mwana waani mu lwitikho. ¹¹ Mu nsiku zye akubhelengushile atamile muntu we akhondeeye kukwakho, ileelo ishi abha muntu we akhondeeye kukwakho, niine kukwani akhondeeye.

* **1:5** 1:5 Abhafinjile bhonti Bhaazya abhafinjile mu Wilulanyo uwa mazwi amajeni. † **1:10** 1:10 UNeesimo kwe kuti uMuntu we akhondeeye.

12 Pe shiniisho, inkumugalusya kukwakho, wununu imuganile ku mwoyo waani wonti. 13 Naayiganile asyale ipa niine, inga anavwaje gaala ge waamile unavwaje, mu khabhalilo khe inkunguilwe kunongwa yi Ntumi iNyinza. 14 Heelo litaliipo naalimo lye ingalibhomba sita weewe kunitishizya. Inga wanavwaga, kwavwa kwakho kubhe kwa shigane shaakho waneewe, lyoli kutakhabhe kwi dala ilya kubi-jilwa. 15 Lumo uNeesimo asogooye kukwakho ukwo ku khabhalilo khashe, inga uMlungu amugalulanye agalushe kukwakho uyikhale peeka nawo mwa Yeesu Kilisiti wila na wila. 16 Te abhe mutumwa waakho bhulo khaala, lyoli atibhe nholo witu umuganwa mwa Yeesu Kilisiti. Ine imakundiye nhaani, iwe we utimukundile nhaani kushila anzu mwana uwa mu nyumba mawakho, kabhili nholo mwa Mwene.

17 Pe shiniisho, inga ukuyilola kuti ali nu wapeeka niine, umuposheele akhinza anza she waamile umposheelaje ine nuneene. 18 Inga kuli na zimo zye atulile kukwakho, awe ali ni deeni kukwakho, ine intikusombe. 19 *Ine ne Paulo inkusimba ziniizi nuneene ni nyoobhe yaani, kuti ine intisombe. Peeka na ziniizyo, yitakuti inkukumbusye, iwe umanyile kuti wu naanu we akulumbiye, lyoli yikuti uyifumwe waneewe kukwani.* 20 Ishi nholo waani mu lwitiko, unaavwe mwa Mwene witu, kabhili unsansamusye umwoyo mwa Kilisiti. 21 Inkukusimbila ikalaata ili, kunongwa ye inkusubhila kuti utiniitiche ku gaala ge

nakulaabha. Imanyile kati, utibhombe kushila na ganaago.

²² Peeka na ziniizyo, inkukulaabha undinganizanye ulupitu pe inhayikhala. Kunongwa ye inkusubhila kati, kufumilana ni mpuuto zyinyu, uMulongu atinsatule mwi jeela, inga ininze kukwinyu kubhayaatila.

Amazwi aga kulagana

²³ Unholo waani uEpaafula akukulamukha, uweene niine twenti tukungiilwe peeka mwi jeela, kunongwa iya kulumbiilila iNtumi iNyinza izya Yeesu Kilisiti. ²⁴ Bhoope abhabhombi abhamwitu abha panaapa, uMaalika, uAlisitaaliko, uDeema, nu Luuka bhakukulamukha. ²⁵ Uwiila wa Mwene uYeesu Kilisiti wabhe peeka niimwe mweni.

**ULufingo uLupwa ku ndongo iya Shimalila
Malila: ULufingo uLupwa ku ndongo iya Shimalila
(New Testament+)**

copyright © 2020 Wycliffe Bible Translators, Inc.

Language: (Malila)

Contributor: SIL International (in Africa)

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

3aa8e7a3-f258-5182-ab3f-fbc6f725bb06